

EKALESIA FAAPOTOPOTOGA KERISIANO  
I AMERIKA SAMOA



**VASEGA AMATA II**

**2026**

++++\*\*\*\*\*++++

**AUKUSO - TESEMA**

\*\*\*\*\*

**SAUNIA : OFISA O A'OA'OGA KERISIANO**

**ASO SA: AOKUSO 02, 2026**

**MATAUPU 01: “O SAULO, O LE TUPU SA’ILILI” (Saul the searching King)**

**TUSI FAITAU: 1 SAMUELU - 9: 15-21**

**SINI:** Ia malamalama le fanau, o le ola saili o Saulo, na tofia ai e le Atua e avea ma tupu muamua o Isaraelu.

**TAULOTO – “O le fa’alogo e sili lea i le taulaga, ma le usiusita’i e sili lea i le ga’o o le mamoe po’a.”**

**FESOASOANI MO FAIAOGA:**

Suafa o Iesu Keriso le ta’ita’i sili o le galuega, e faatalofa atu ai i lau Susuga. Malo le fa’atoatoa, malo le onosa’i i le soifua ofoina atu mo le Ekalesia e ala i le A’oga Aso Sa. Ua tatou aulia mai le afa mulimuli o galuega fa’agasolo o lenei tausaga, fa’afetai lagolagosua i fa’atinoga o mataupu mo nai fanau. Ta’oto atu pea i lau Susuga le faitauina o le Tusi Paia, fa’atasi ai ma nisi o au sa’iliiliga, fa’amautūina ai lau tapenaga mo le fanau. Fa’amanuia le Atua i galuega a feagai ai.

**FESOASOANI MO LE MATAUPU:**

O le tala o lenei taeao, o lo’o fa’amatalaina e le mataupu atoa le ola saili o Saulo. Ua leiloa asini a Kiso le tamā o Saulo. Ona fai atu lea o Kiso ia Saulo ma se tasi o taulealea, i na o atu ia e su’e ma saili mai ana asini. E lei faigofie le galuega sa faia, auā sa a’ea’e i mauga ma ifoifo i vanu. Ua la fiu foi e sa’ili e le’i maua. Ua o’o atu i laua i le nu’u o Sufi, ua amata ona fa’avaivai Saulo ma fa’apea ane ai, e la te toe fo’i. A ua fai atu le taule’ale’a ia Saulo, o lo’o iai i’inei le tagata o le Atua, na te fa’asino ma ta’u mai ia i ta’ua se ala ta te ui atu ai. Ua tonu i le manatu o Saulo lea fuafuaga. Ona la o lea ma ave le la meaalofa (sekeri ario), mo le tagata o le Atua (Perofeta o Samuelu).

Ua musumusu le Alii i le taliga o Samuelu ma fa’apea atu, “O le itu aso taeao ou te auina atu ai le tagata mai le nu’u o Peniamina, e te fa’au’u ia te ia e fai ma alii (tupu) o lo’u nu’u o Isaraelu. Ua iloa mai Saulo e Samuelu, ona ta’u atu lea e le Alii ia te ia, “o le tagata lena na ou fai atu ai ia te oe, e pule o ia i lo’u nu’u. Ona faia lava lea e Samuelu le finagalo o le Atua. Ua latou ‘aai ma talatalanoa, ma fa’ailoa ai e Samuelu, aua le toe popole pe manatu i asini auā ua maua. O le onosa’i o Saulo na mafua ai ona fa’aauauina le sa’iliga. O le sa’ili o Saulo i le auauna a le Atua na manuia ai. E le gata ua toe maua asini a lona tamā, a ua tofia foi o ia e le Alii, e fai ma tupu muamua o Isaraelu. E tofia e le Atua le tagata e sa’ili i mea lelei, tapenaina ma fa’aaogaina i so’o se tulaga taua ma fa’apitoa.

**A’OA’OGA:**

1. To’aga i le a’oga, e sa’ili le atamai.
2. To’aga i le lotu ma le A’oga Aso Sa, e sa’ili le poto mai le Atua
3. Sa’ili le Atua, e manuia ai

\*\*\* Ma nisi a’oa’oga talafeagai te finagalo ai.

**GALUEGA FAATINO:** Fesili / Tali

1. O ai le tupu muamua o Isaraelu? ( O Saulo)
2. O a mea na sa’ili e Saulo? ( Asini ma le tagata o le Atua)



### **FESOASOANI MO FAIAOGA:**

Malo le galulue, fa'afetai le fa'amalolosi i le ola ofoina atu mo le Ekalesia ma lana A'oga Aso Sa. O le a fa'aauauina pea le tala ia Saulo mo lenei masina. Tu'u atu lava i lau Susuga le faitauina o le Tusi Paia, aemaise nisi o au su'esu'ega e tapenaina ai lau mataupu mo le vasega a fanau. Manuia tele galuega a feagai ai.

### **FESOASOANI MO LE MATAUPU:**

Le aso Sa ua tuana'i na talanoaina ai le ola sa'ili o Saulo, na tofia ai e avea ma tupu o Isaraelu. Lea ua fa'aauauina mai le mataupu o lenei taeao, le fa'au'uina e Samuelu o Saulo. Ua tago Samuelu i le fagu u'u (oil) ma liligi ifo ai i le ulu o Saulo. O le fa'aailoga ua tofia ia e le Alii e fai ma ta'ita'i o lona nu'u. Ua fa'apopotoina e Samuelu Isaraelu uma i luma o le Atua i Mesepa ma ta'u atu i le nu'u le finagalo o le Alii, ua fa'apea mai: *O a'u na aveina a'e ia Isaraelu nai Aikupito, ma ou lavea'iina outou nai lima o Aikupito, ma lima o malo uma na fa'asauā ia te outou.*

Ua silafia e le Atua mana'oga a le nu'u. Ua latou lafoa'i le Alii na lavea'i ma fa'aola le nu'u, a ua latou manan'ao e tofia se tupu mo i latou. Vala'au Samuelu i le nu'u e fa'alatalata mai, se'i fa'aailoa le tagata ua tofia e le Alii e fai ma tupu. Ua latou saili ia Saulo, a ua leiloa o ia. Ua latou toe fesili lea i le Alii, "Ua sau ea i'inei le tagata?" Fetalai mai le Alii, "Fa'auta, o lo'o lafi o ia i le vao oa". (He has hidden himself among the baggage). Ua o atu le nu'u ua a'ami ma 'aumi fafo Saulo mai le mea na lafi ai. Ua tau fai ofo le nu'u ina ua latou va'ava'ai i le tagata ua filifilia e le Atua e fai ma ta'ita'i. E maualuga ma tino lelei, leai se tasi o le nu'u e tusa ma ia. Ona alalaga ai lea o Isaraelu uma ma fa'apea atu, "Ia soifua le tupu!" (Long live the King).

### **A'OA'OGA:**

1. Aua le fa'amānaia / mā e fesili. (Do not be shy or ashamed to ask question)
  2. E filifilia e le Atua le tagata e ta'ita'i tusa lava pe fa'amanaia.
  3. Aua le fa'amanaia e fesili i le Atua, e ala i le tatalo.
- \*\* Ma nisi a'oa'oga te finagalo ai.**

### **GALUEGA FAATINO:** Valivaliga ata.

Lena ua tu'uina atu i lalo le ata valivali mo le fanau. Fa'amolemole, saunia ane e lau Susuga ni peni vali (crayons), ma ni kopi o le ata ua tu'uina atu, mo galuega a le fanau.

### **PESE:** He's Able!

**\*\* He's able, He's able, I know He's able  
I Know my Lord is able to carry me through**



\*\*\*\*\*MANUIA LE SAPATI\*\*\*\*\*

**ASO SA: AUKUSO 16, 2026**

**MATAUPU 03: O SAULO, O LE TUPU LĒ USITA'I. (The disobedient King)**

**TUSI FAITAU: 1 SAMUEL 15: 13-24**

**SINI:** Ia malamalama le fanau i le taua o le usita'i.

**TAULOTO – “O le fa’alogo e sili lea i le taulaga, ma le usiusita’i e sili lea i le ga’o o le mamoe po’a”**

**FESOASOANI MO FAIAOGA:**

Soifua manuia i le alofa o le Atua. Fa’afetai le onosa’i i galuega fa’atino mo le fanau. Tatou fa’aauau pea i le tala ia Saulo ma nisi o tulaga na tutupu i lana ta’ita’iga, e ‘oto’oto mai ai se feau taua mo le fanau. Fa’amoemoe lava i lau faitauga o le tusi faitau ma nisi o au sailiga, e fa’aatoatoa ai lau tapenaga mo le mataupu o lenei aso. Manuia tele lau galuega!

**FESOASOANI MO LE MATAUPU:**

Ua fa’au’uina Saulo e fai ma tupu o Isaraelu, ona fa’ailoa lea e Samuelu ia Saulo le finagalo o le Alii. Ua fetalai le Atua o ‘au, “ Ou te tau ai le mea na faia e le nu’u o Amaleka ia Isaraelu”. Ina ua o ese mai Isaraelu mai Aikupito, na osofa’ia le nu’u e Amaleka. Fetalai le Atua ia Samuelu e fa’atonuina Saulo, e fasi ia Amaleka ma fa’aumatia ana mea uma, aua nei iai se mea e fa’asaoina. Ua fasi e Saulo ma lana ‘au tau Amaleka. O le mea ua tupu, ua fa’asao e Saulo le tupu o Amaleka o Akako, fa’atasi ai ma nisi o manu. Ua fai atu Samuelu ia Saulo, o a tagi a mamoe ma povi lea ou te fa’alogo atu ai? Fai mai Saulo, ua fa’asaoina povi ma mamoe aupito lelei, ina ia fai ai taulaga mo le Atua. Fai atu Samuelu, o le a le mea ua e le usita’i ai ma fa’alogo i le Alii? **O le fa’alogo e sili lea i le taulaga, ma le usiusita’i e sili lea i le ga’o o le mamoe po’a.** Ua faia e Saulo le mea na manana’o iai le nu’u, ma naunau iai lona loto, ae galo na usita’i i fa’atonuga a le Atua. O le lē usita’i, na mafua ai ona lafoa’i e le Alii Saulo e le toe avea ma tupu o Isaraelu. God cares more about us obeying Him than just pretending to be good.

**A’OA’OGA:**

1. O le usita’i, e maua ai le mea lelei.
  2. Fa’alogo i matua, usita’i i tulafono a le Atua, e manuia ai.
- \*\* Ma nisi o a’oa’oga talafeagai e te finagalo ai.**

**GALUEGA FAATINO:** Short Memory Verse (Tauloto)

**1 Samuel 15: 22 - “To obey is better than sacrifice”**


**PESE: Fa’alogo ma usita’i e leai se isi ala**

1. *Fa’alogo ma usita’i e leai se isi ala, e fiafia ai Iesu pe a fa’alogo ma usita’i....x2*

*Tali: Galue ma le fa’amaoni, fiafia ma olioli*

*E maua ai le tau, e aumai e Iesu*

*Fa’alogo ma usita’i e leai se isi ala, e fiafia ai Iesu pe a fa’alogo ma usita’i.*



\*\*\*\*\*MANUIA LE ASO SA\*\*\*\*\*

**ASO SA: AUKUSO 23, 2026**

**MATAUPU 04: “E SILI LE LOTO NAI LO’O LE TINO.” (Heart is greater than appearance)**

**TUSI FAITAU: 1 SAMUEL 16: 1-13**

**SINI:** Ia a’oa’oina le fanau, e silasila (va’ai) le Atua i le loto.

**TAULOTO – “O le fa’aloge e sili lea i le taulaga, ma le usiusita’i e sili lea i le ga’o o le mamoe po’a”**

**FESOASOANI MO FAIAOGA:**

Avatu pea le agaga fa’afetai mo tapenaga o mataupu a le fanau. Malo le fa’amalolosi, malo le onosa’i i le soifua ofoina atu mo le Alii ma ana feau. Vaega mulimuli lena o le tala ia Saulo. Taumafai lava e fa’agasolo lena mataupu ina ia feso’ota’i le mafua’aga na to’ilalo ai Saulo, ae filifilia Tavita e fai ma tupu o Isaraelu. Fa’amoemoe lava i lau faitauga o le Tusi Paia ma nisi o au su’esu’ega, e fa’aatoatoa ai se taumafaga mo le mataupu a fanau lena aso. Manuia le tapenaga!

**FESOASOANI MO LE MATAUPU:**

Ua manino le tala i le tulaga na mafua ai ona lafoa’i e le Alii Saulo e le toe avea ma tupu o Isaraelu, pei ona iai nisi o mataupu o Aso Sa ua mavae atu. E ui o Saulo o le tagata tino lelei ma maua luga, a o lana fa’ai’uga na fa’aletonu ai, ina ua le usita’i i fa’atonuga a le Alii. O le lē usita’i o Saulo na amata mai i lona loto, mafua ai ona le fa’amaoni. Na fa’anoanoa Samuelu ina ua lafoa’i e le Alii Saulo ina ia le fai ma tupu o Isaraelu. Fetalai le Atua ia Samuelu, “fa’atumu lau fagu nifo i le suāu’u ma e alu atu ia Iese le Petele’ema, auā ua ou iloa i ona atalii, le tasi ou te faia ma tupu”. Ua alu Samuelu ma fa’aioa le finagalo o le Alii ia Iese ma ona atalii. Ua latou mafuta ma fai taulaga fa’atasi. Ua o ane atalii e to’afitu a Iese i luma o Samuelu, o tagata tino lelei ma maua luga. Peita’i e le’i filifilia e le Alii i latou nei. Fetalai le Alii ia Samuelu, aua le va’ai i le tino. Auā o le tagata e va’ai i le tino, a o le Atua e va’ai i le loto. Ua fai atu Samuelu ia Iese, po ua atoa mai lana fanau. Ua fai mai o ia, toe lava o le ui’i, o lo’o leoleo ia i mamoe. Ua ia a’ami i a Tavita, ona sau ai lea o ia. Fetalai le Alii, ina fa’au’u ia te ia, auā o ia lena. Ua filifilia e le Atua Tavita ona o le tagata e loto usita’i, loto alofa, ma lotu fa’amaoni. E le o se tagata tino lelei ma maua luga. E laititi ma fa’atauva’a, ae na usita’i, alofa, ma fa’amaoni, e tausi ma leoleo mamoe a lona aiga. Ona tago lea o Samuelu i le fagu nifo o suāu’u, ua fa’au’u ai ia te ia i luma o ona uso. God sees the heart. It is better to be humble than to be proud like Saul was. Even though Saul was tall and handsome, God cares more about what is inside our hearts.

**A’OA’OGA:**

1. O le lotu usita’i, e maua ai le mea lelei.
2. O le lotu alofa ma le lotu maua luga, e fiafia iai le Atua.

**\*\* Fa’atasi ai ma nisi a’oa’oga te finagalo ai.**

**GALUEGA FAATINO: Maze Puzzle**

Fa’amolemole fai ni kopi o le paso (puzzle) ma ni peni vali mo galuega a le fanau.

**PESE:** Into my Heart!

*Into my heart, into my heart*


*Come into my heart, Lord Jesus*

*Come in today, come in to stay*

*Come into my heart, Lord Jesus*

# THE STORY OF DAVID DAVID AND SAMUEL

Guide David to his father Jesse.



\*\*\*\*\*

**ASO SA: AUKUSO 30, 2026**

**MATAUPU FA'AMANATU O AUKUSO: FESILI MA TALI**

Momoli le agaga fa'afetai i lau Susuga tusa ai ma galuega mae'ae'a o lenei masina. O le aso lenei ua atofa mo mataupu fa'amanatu a le fanau. E iai le manatu o le a ta'oto atu i lau Susuga su'ega a le fanau, e fua i lau silasila ma lau fa'ataau. Ua ia te oe le agatonu e fa'agasolo ai le fa'atinoga o le fa'amanatuina o mataupu, i le auala e faigofie mo tamaiti. Tautuana le tauloto ia ma'ea lenei masina ua maumautaia e fanau ma taofimau i ai. A o se tu'ualalo, ia aofia uma mataupu ta'itasi o lenei masina na a'oa'oina i lau tapenaga. Manuia tele lau galuega lenei aso, manuia le a'oa'oina o le fanau.

\*\*\*\*\*

**ASO SA: SETEMA 06, 2026**

**MATAUPU 05: “O LE A LE TALALELEI?” (What is good news?)**

**TUSI FAITAU: MATAIO - 28: 1-10**

**SINI:** Ia malamalama ma iloa e le vasega, le uiga o le “Talalelei”

**FESOASOANI MO FAIAOGA:**

Fa’afetai i le Atua ua tatou aulia manuia lenei masina fou i lona alofa. Fa’amalo le galulue, fa’afetai le onosa’i i fa’atinoga o mataupu a le fanau. Lenei masina o le a fa’agasolo ai nisi vaega taua e uiga i le Talalelei. Manino lava o le maliu ma le toe tu o le Alii’, o le Talalelei lea.

**FESOASOANI MO LE MATAUPU:**

E iai le lagona, ua malamalama ma lau silafia e lau Susuga le mataupu o le Talalelei. Tala i le fa’aolataga a le Atua mo le lalolagi atoa, tala e uiga ia Iesu. Amata mai lava lenei tala i le fanau mai o Iesu i le fale o manu. Iesu sa ola i se olaga usita’i i ona matua, aemaise le Atua. Sa ola i se olaga lelei e ala i lona fesoasoani atu. Na fai vavega ma fa’amalolo i tagata mama’i, sa ia alofa foi i so’o se tasi. O le tagata e leai se sala, e le’i agasala foi. Peita’i, ua agasala le lalolagi, le ala lea na sau ai Iesu e fa’ataunu’u le fa’aolataga a le Atua. Na fa’asatauroina Iesu ma maliu i le Satauro, ma tanumia i le tu’ugamau. O se ata e fa’avaivai loto, ma o se tala fa’anoanoa foi pe a o’o mai le oti i le tagata. Peita’i, o le mataupu o lenei taeao, o se tala ua lelei, ina ua toe tu Iesu. Lea ua fa’ato’ilaloina e Iesu le oti, ina ua toe tu manumalo. O le Talalelei lena ia olioli ai tagata uma. Ona o le fa’aolataga a le Atua mo le lalolagi, lea ua taunu’u ia Iesu, ua fa’aolaina ai foi ma tatou uma.

**A’OA’OGA:**

1. E alofa Iesu ia oe ma a’u.

\*\*\* Ma nisi a’oa’oga te finagalo ai.

**GALUEGA FAATINO: Fesili / Tali**

1. O le a le Talalelei? (Tala i le maliu ma le toe tu o Iesu, Tala i le fa’aolataga o tagata agasala uma o le lalolagi)

\*\*\* Ma nisi fesili ua e manatu ai.

**PESE: E alofa le Atua ia te a’u (My God loves me, and all the wonders I see)**



**ASO SA: SETEMA 13, 2026**

**MATAUPU 06: “TALA’I LE TALALELEI” (Preach the Good News)**

**TUSI FAITAU: MATAIO - 28: 16-20**

**SINI:** Ia a’oa’oina le fanau, o i latou foi o ave feau o le Talalelei. (For they too, are preachers of the Good News)

**FESOASOANI MO FAIAOGA:**

E avatu lava le agaga fa’afetai tele mo galuega fa’atino mo le fanau. Malo le lava papale ma le onosa’i i tapenaga o Aso Sa ta’itasi. Fa’aauauina pea le mataupu o le “Talalelei” ina ia fa’amasani le fa’alogo a fanau i lea upu, ma fa’ailoa lona taua, e tapenaina ai lo latou malamalama a o tuputupu a’e. Tu’u atu lava i lau Susuga le fa’amatalatalaina o galuega alofa na faia e Iesu, pei ona iai le mataupu le aso Sa ua mavae. A ia manino fanau i le feau o lenei aso, o i tatou uma e o’o i fanau, o molimau o le Talalelei ia Iesu.

**FESOASOANI MO LE MATAUPU:**

Fa’amatalaina e le mataupu o le vaiaso ua mavae le uiga o le Talalelei. O le fa’aolataga a le Atua mo le lalolagi agasala, na mafua ai ona maliu ma toe tu le Alii o Iesu. Peita’i, o i’ina o lo’o momoli mai ai le ata o le Atua alofa. Molimau galuega na faia e Iesu i lana galuega. Fa’amalologa ma vavega tetele na ia faia, na fa’ailoa ai le alofa lavea’i o Iesu. Le alofa na fa’asoa atu ma fesoasoani atu i tagata vaivai, ma tagata ua puapuagatia. E o’o lava foi i le tagata agasala, lea lava na maliu ma toe tu ai, pei ona iai le uiga o le Talalelei. Peita’i, o le mataupu lenei itu aso, ina ua toe tu Iesu, na ia fetalai ai i lona ‘au so’o, *“ia outou o atu e fai nu’u uma lava ma so’o ma papatiso atu ia te i latou i le suafa o le Tamā, ma le Atalii, ma le Agaga Paia. Ia outou a’oa’o atu ia te i latou ia tausi i mea uma ua ou fai atu ai ia te outou”*. O le vala’au foi lena a Iesu mo so’o se Kerisiano, fa’apea outou le fanau. Ia fai tatou ma molimau e fa’ailoa le galuega na faia e Iesu. Tatou tala’i le Talalelei, e ala i le alofa atu ma fesoasoani atu i isi tagata. Fa’asusulu atu le tala o le alofa o Iesu, ina ia ola ai le isi tagata o mana’omia le fesoasoani.

**A’OA’OGA:**

1. Fa’ailoa atu le alofa, ae le o le ita. (Spread love, not hate)
2. Taofi le fa’amisa, a ia agalelei atu. (Stop bullying, but have mercy)

\*\*\* Ma nisi a’oa’oga te finagalo ai.

**GALUEGA FAATINO: ATA VALIVALI**


Fa’amolemole lau Susuga, fai ni kopi o le ata ua tu’uina atu fa’atasi ai ma ni peni vali, e fa’atino ai le galuega a le fanau i lenei taeao.

**PESE: Yes! Jesus loves me**


*Jesus loves me this i know, for the Bible tells me so*

*Little ones to Him belong, they are weak but He is strong*

*-Yes Jesus loves me, Yes Jesus love me, Yes Jesus loves me, the Bible tells me so-*



KOLOROWANKI.NET.PL  
Wszystkie prawa zastrzeżone



**ASO SA: SETEMA 20, 2026**

**MATAUPU 07: “AUTU O LE TALALELEI” (Purpose of the Good News)**

**TUSI FAITAU:** IOANE - 3: 16

**SINI:** Ia malamalama le fanau, o le alofa o le Atua na auina mai ai Iesu.

**FESOASOANI MO FAIAOGA:**

Momoli le agaga fa’afetai tele i lau Susuga mo vasega a le fanau i Aso Sa ta’itasi. E iai le manatu o le tala fa’ai’u lenei o le masina a o fa’agasolo ai le mataupu i le Talalelei. Naunauta’iga lava ia fa’amasani le fa’alogo a le fanau i le upu “Talalelei”, ma amata fa’ailoa lona uiga. O le a fa’ai’uina lenei mataupu i le ‘autu na maliu ai Iesu ma toe tu manumalo. Taoto atu lava i lau Susuga ma lau tapenaga, se auala faigofie e fa’afeso’ota’i ai mataupu ua mavae, ma le ‘autu o lenei taeao. Fa’amanuia le Atua i lau galuega!

**FESOASOANI MO LE MATAUPU:**

O le ‘autu atoa lea o le Talalelei, e afua i le alofa tunoa o le Atua. O le alofa na tapenaina ai le fa’aolataga mo le lalolagi ma le tagata agasala, pei ona molimau ai Ioane. *“Auā ua fa’apea lava ona alofa mai o le Atua i le lalolagi, ua ia aumai ai lona Atalii e to’atasi, ina ia le fano se tasi e fa’atuatua ia te ia, a ia maua e ia le ola fa’avavau.”* *“For God so loved the world that he gave his only Son, so that everyone who believes in him may not perish but may have eternal life.”* O le taua ma le aoga lena o le Talalelei. E fa’ailoa i tagata uma le alofa o le Atua na ‘auina mai ai Iesu. Na maliu mo tagata uma, ma toe tu manumalo, ina ia tatou maua le ola e fa’avavau.

**A’OA’OGA:**

1. E alofa Iesu ia i tatou uma. (Jesus loves us all)
2. Alofa i ou tuā’oi. (Love your neighbors)

\*\*\* Ma nisi a’oa’oga ua e manatu ai.

**GALUEGA FAATINO: Tusi Ata** (Draw a circle)

Fa’amolemole tapena ifo ni pepa ma peni vali mo fanau, e tusi ai le ata o se li’o lapotopoto (circle). O lo’o fa’amatalaina e le pese o i lalo le ata o le li’o, o lo’o fa’atusa i le alofa o le Atua.

**PESE:** Le alofa o le Atua, pei o se li’o tele!

*Le alofa o le Atua pei o se li’o tele, E ta’amilo lava leai se gata’aga  
Le alofa o le Atua fai pea e le gata, E alofa pea o ia i aso uma lava  
God’s love is like a circle, a circle big and round.  
And when I see a circle, no endings can be found  
And so the love of Jesus, grows strong eternally  
Forever and forever, I know my God loves me*

\*\*\*\*\*

**ASO SA: SETEMA 27, 2026**

**MATAUPU FA’AMANATU O SETEMA: FESILI MA TALI**

Momoli le agaga fa’afetai i lau Susuga tusa ai ma galuega mae’ae’a o lenei masina. O le aso lenei ua atofa mo mataupu fa’amanatu a le fanau. E iai le manatu o le a ta’oto atu i lau Susuga su’ega a le fanau,

e fua i lau silasila ma lau fa'atatau. O le faiga masani lava, e ia te oe le faiga aupito faigofie e fa'amanatu ai i fanau ia a outou mataupu sa a'oa'oina. O lona uiga, e pule oe i le auala e fa'aaoga ia mautinoa ua maua se 'ai mo i latou. A o se tu'uallalo, ia aofia uma mataupu ta'itasi o lenei masina na a'oa'oina i lau tapenaga. Manuia tele lau galuega lenei aso, manuia le a'oa'oina o le fanau.

\*\*\*\*\*

## **OKETOPA: MALOLOGA MO LE LOTU TAMAITI**

**MANUIA TELE TAPENAGA MA LE ALO ATU I LE ASO SA PA'EPA'E O LE FANAU, FA'AMANUIA ATU LE ATUA I FANAU UMA O LE EFKAS.**

\*\*\*\*\*

**ASO SA: NOVEMA 01, 2026**

**MATAUPU 08: "O LO'O IA TE OE LE ATUA (God is with you)**

**TUSI PAIA: IOSUA - 1: 1-11**

**SINI:** Ia malamalama ma iloa e le fanau, po'o fea lava e alu ai, e iai fa'atasi ma le Atua.

**TAULOTO – "Ia e fa'amalosi ma lototele..... (fa'aauau Aso Sa o lumanai....)**

### **FESOASOANI MO FAIAOGA:**

Fa'afetai i le alofa o le Alii ua tatou aulia mai lenei masina fou. Malo le folau, malo galulue i tofiga ua vala'auina ai. Mae'a atu malologa o le Aso Sa pa'epa'e a le fanau, fa'afetai le lagolagosua. O lenei masina, o le a taumafai e fa'aailoa nai mataupu 'ese'ese e fa'amasani ai le fa'alogo a le fanau. Ta'oto atu lava i lau Susuga le faitauina o le Tusi Paia ma nisi o au su'esu'ega e fa'amautu atili ai lau mataupu. Manuia tele lau tapenaga!

### **FESOASOANI MO LE MATAUPU:**

Ua oti Mose, ona tofia lea o Iosua e fa'aauauina le malaga o le nu'u o Isaraelu i le nu'u folafolaina. E le'i faigofie le ala na savalia e Isaraelu ina ua o ese mai Aikupito, auā sa tele faigata sa feagai ma i latou. Peita'i, o le tala lenei taeao, lea ua sauni Isaraelu e sopoia (kolosi/cross) le vaitafe o Ioritana ma ulufale atu i le nu'u folafolaina (Kanana). Lea foi ua sauni Isaraelu e fesaga'i ma faigata, o le kolosiina o le vaitafe. A o upu fa'amalosi 'au nei a Iosua i le nu'u, pei ona iai le 'autu o lenei taeao. "*Ia e fa'amalosi, ma loto tele. Aua e te fefe, aua e te mata'u. Auā o le Alii lou Atua o lo'o ia te oe i mea uma e te alu i ai.*" Le i'uga o le tala, na sopoia (cross) e Isaraelu le vaitafe ma taunu'u manuia i Kanana, auā sa auai le Atua ma puipui i le nu'u.

### **A'OA'OGA:**

1. Ia e fa'amalosi ma loto tele e alu i le a'oga (Be strong and courageous to go to school)
2. Aua e te fefe, o lo'o ia te oe le Atua i taimi uma. (Do not be terrified/scared, God is with you all the time).

**GALUEGA FAATINO: Valivali Ata**

Sauni ane lau Susuga ni peni vali ma ni kopi o le ata ua tu'uina atu, mo galuega a le fanau. Fa'amatala i le fanau le auai o le Atua na mafai ai ona sopoia le vai ioritana.



\*\*\*\*\*

**ASO SA: NOVEMA 08, 2026**

**MATAUPU 09: “UA LAVEA’IINA TANIELU E LE ATUA” (God saves Daniel)**

**TUSI PAIA: TANIELU - 6: 1-24**

**TAULOTO – (fa’aauau mai le vaiaso ua tuana’i – “aua e te fefe, aua e te mata’u.....”)**

**SINI:** Ia malamalama le fanau o le auai o le Atua soifua na fa’asaoina ai Tanielu mai le lua o leona.

### **FESOASOANI MO FAIAOGA:**

Malo le tauata’i, fa’afetai le lava papale i le tatou galuega. Ua tu’uina atu le tusi faitau o Tanielu, ina ia faitau mae’ae’a ai lau Susuga mo se malamalamaaga atili i le tala ia Tanielu. O le fa’amoemoe mauualuga, ia fa’apupula atili ai le tala, ma ia feso’ota’i pea le mataupu o le “auai o le Atua”. Naunauta’iga lava ia fa’amasani le fa’alogo a le fanau i le igoa o Tanielu, ma a’oa’oina ai pea i latou i le auai o le Atua i ona tagata. Fa’atasi ai ma nisi o au su’esu’ega ma tapenapenaga, e fa’afaigofie ai ona momoli lau mataupu. Manuia galuega a feagai ai!

### **FESOASOANI MO LE MATAUPU:**

Tanielu 6: 22– “Ua ‘auina mai e lo’u Atua o lana agelu, ua punitia ai gutu o leona, ua le afaina a’u; auā ua silafia e ia ua leai sa’u amio i ona luma; e leai foi se mea leaga ua a’u faia i ou luma, le tupu.” O Tanielu o le perofeta a le Atua. O se auauna e tumau ma fa’amaoni lona olaga i lona Atua i aso uma. E mafuta i le Atua i le tatalo i mea uma e manatu i ai o ia. Fai mai na lafoina Tanielu i le lua o leona, peita’i, e le’i ‘aina e leona o lo o i totonu o le lua. A o iai o ia i totonu o le lua (āna), na tatalo ma anapogi Tanielu i le Atua e fesoasoani mai ia te ia. O le tumau o lona fa’atuatua ma fa’alagolago i lona Atua, na lavea’iina ai lona ola mai manu fe’ai. Iloa lelei e Tanielu o lona Atua, e auai ma iai fa’atasi ma ia i taimi uma. Ioe, e mana’omia tele lo tatou iloa ma malamalama i lo tatou Atua. O le Atua e alofa, ma o le Atua e lavea’i mai i tatou mai mea leaga ma faigata o le soifuaga.

### **A’OA’OGA:**

1. E lavea’i e le Atua i tatou mai mea faigata.
2. Tatalo ma fa’alagolago i le Atua i taimi ma aso uma.

\*\*\* Ma nisi a’oa’oga ua e manatu ai.

### **GALUEGA FAATINO: Valivaliga Ata.**

Fai se kopi o le ata ua tu’uina atu, e galulue ai nai fanau i le valivaliina.

### **PESE: Le alofa o le Atua e ofoofogia. (God’s love is so wonderful)**

*Le alofa o le Atua e ofoofogia (3x)*

*Le alofa silisili lea mo a’u*

*E mauualuga ou te le a’eina, e maulalo oute le mauuina*

*E lautele ou te le mao’poina, le alofa silisili lea mo a’u*

**Daniel prayed to Jehovah, and  
the lions did not harm him.**



@bible\_scriptures

**Daniel 6:22**

**ASO SA: NOVEMA 15, 2026**

**MATAUPU 10: “TAVITA MA KOLIATA” (David and Goliath)**

**TUSI PAIA: 1 SAMUEL 17: 45-50**

**SINI:** Ia iloa ma malamalama le fanau, na manumalo Tavita i le toa o Koliata.

**TAULOTO – (soso’o mai le vaiaso ua tuana’i.....”*aua o le Alii lou Atua o lo’o ia te oe i mea uma e te alu i ai*)**

#### **FESOASOANI MO FAIAOGA:**

Malo le galulue, fa’afetai le onosa’i i le a’oa’oina o le fanau. Ua aumaia le tala ia Tavita ma Koliata, e fia tuliloaina pea le ‘autu o le “auai o le Atua”. E iai le manatu ia fa’agasolo ma f’aafeso’ota’i pea mataupu o lenei masina e f’aamasani le fa’alogo a fanau i le igoa o le Atua. Tu’uina atu pea i lau Susuga le tusi faitau fa’atasi ma nisi o au sailiga e fesoasoani atili i lau galuega, aemaise se gagana faigofie mo lau mataupu. Manuia tele lau tapenaga.

#### **FESOASOANI MO LE MATAUPU:**

O le tala ia Tavita ma le toa o Filisitia e igoa ia Koliata. O Tavita ua na’o se tamaitiiti, a o Koliata o se tagata tino telē ma maua luga, o se tagata e uiga ese lona malosi pei se sau’ai. Fai mai ua fefefe le ‘au tau a Isaraelu i lenei tagata. Ua leiloa foi e Isaraelu pe fa’afefea ona latou fa’ato’ilaloina lea tagata faigata. Peita’i, e fa’atauva’a lava le au’upegā na fa’aaogaina e Tavita. Ua na o ma’a e lima mai le vaitafe ma le ma’atā na ia ave e tau ai ma le toa tino ese lea o Koliata. Fai mai Tavita ia Koliata *“E te sau ia te a’u ma le pelu ma le tao, ae ou te alu atu ia te oe i le suafa o le Alii o ‘au, o le Atua o le itutaua o Isaraelu, ua e fāifai i ai”*. Fai mai na tu atu Tavita ma le ma’atā ma lia’i atu ai le ma’a ia Koliata. Fai mai le tala, na lavea ma oti Koliata ina ua tau le ma’a i lona muaulu, ona manumalo ai lea o Tavita. Ioe, ua na o le Atua malosi lava tatou te ‘au fa’atasi, e manuia ma tatou manumalo ai mai le fili ma mea faigata uma o le olaga, pe afai tatou tumau i le ola talitonu i le Atua. Auā o le Atua alofa, e auai pea ma lana fanau i taimi uma.

#### **A’OA’OGA:**

1. Talitonu ma fa’atuatua i le Atua.
2. E ‘au le Atua ma i tatou pe a tatou fa’atuatua.

#### **GALUEGA FAATINO:** Ata Fa’amatala

Lena ua tu’uina atu se ata o le tala ia Tavita ma Koliata, ia fa’amatalatalaina i le fanau mo se malamalamaaga atili i le mataupu o lenei aso.

#### **PESE: Tumau ma Pipi’i mau**

*Oute tumau ma pipi’i mau (2x)*

*Ti’apolo taumafai e liliu ese a’u, oute tumau ma pipi’i mau*

*A ia e tau malosi tete’e i le fili, aua lava nei e faavaivai*

*A ia e tau mo le Alii o ‘au, e aoga tutumau*



\*\*\*\*\*MANUIA LE SAPATI\*\*\*\*\*

**ASO SA: NOVEMA 22, 2026**

**MATAUPU 11: “LĒ USITAI IONA I LE ATUA” (Jonah Disobey God)**

**TUSI PAIA: IONA 1: 1-17**

**SINI:** Ia a’oa’oina le vasega ma iloa e le fanau, e manuia le tagata e usita’i ma fa’amaoni.

**TAULOTO – “Ia e fa’amalosi ma lototele, aua e te fefe, aua e te mata’u, aua o le Alii lou Atua o lo’o ia te oe e o’o i le fa’avavau”**

**FESOASOANI MO FAIAOGA:**

Momoli le agaga fa’afetai tele i lau Susuga mo mataupu a le fanau. Malo le fa’atoatoa ma le onosa’i i gasologa o le galuega. Ua aumaia le tala ia Iona, ina ia feso’ota’i pea le feau ‘autu o lenei masina, o le “auai o le Atua”. Talitonu o se tala ua lau silafia, ae ta’oto atu lava se taumafaiga vaivai a le tusitala fa’atasi ai ma lau tapenaga, ina ia fa’afaigofie se feau e momoli mo le fanau i lenei aso. Manuia galuega a feagai ai.

**FESOASOANI MO LE MATAUPU:**

O Iona o le perofeta po’o le auauna a le Atua. Na fai iai le Atua e alu i le nu’u o Nineva, e ta’u atu i tagata o le nu’u le leaga o latou amio ma mea o lo o latou faia. Le mea ua tupu, ua le usita’i Iona. E le i mana’o Iona e alu i Nineva, a ua alu o ia i Tasesa. Ua ti’eti’e Iona i le va’a ma ua alu le malaga. Ua agi mai le matagi malosi ma ua tauau ai ina goto le va’a. Ua fefefe le ‘au vaa ua lē mautonu. A o le taimi lea, o lo o moe Iona i le isi itu o le va’a. Ua ave ese nisi oloa mai le va’a, ina ia tau fa’amāmā le uta a le vaa. Ua ala mai Iona ua latou talanoa ma nisi o le ‘au va’a. Ua tonu o le a faia le vili po o ai tonu ua mafua ai le afa. Ua fa’asaga le vili ia Iona. Ona latou malilie lea e lafo o ia i le sami, ona fa’apea lea ona fai. Na lafoina Iona i le sami ona malū ai lea o le sami ma alu ese ai le afā. Saunia lea e le Atua le i’a tele e foloina Iona. Sa iai foi o ia i le manava o le i’a i le tolu po, tolu ao. Ua iloa e Iona lona sesē i lona le usita’i i le Alii. Ua tatalo Iona i le Atua a o iai i le manava o le i’a e fesoasoani ia te ia. Ona fetalai lea o le Alii i le i’a, e ave Iona i le ‘ele’ele matutu. O i’ina, na toe usita’i ai Iona ma fa’amaoni i le Atua.

**A’OA’OGA:**

1. Usita’i ma fa’alogo i matua.
2. Talitonu ma fa’amaoni i le Atua.


\*\*\* Fa’atasi ma nisi a’oa’oga te finagalo ai.

**GALUEGA FA’ATINO: Fesili / Matamataga Ata**

1. O ai na folo e le i’a? (Iona)
2. Aisea na folo ai e le i’a? (Le usita’i i le Atua)
3. Fia po, fia ao na iai Iona i le manava o le i’a? (3 po, 3 ao)

**\*\*Fa’amatamata le fanau i ata ua tu’uina atu. (Saunia foi lau Susuga nisi ata talafeagai)**

**PESE: Fa’alogo ma Usita’i, e leai se isi ala.**



**ASO SA: NOVEMA 29, 2026**

**MATAUPU FAAMANATU O NOVEMA: FESILI MA TALI**

Momoli le agaga fa'afetai i lau Susuga tusa ai ma galuega mae'ae'a o lenei masina. O le aso lenei ua atofa mo mataupu fa'amanatu a le fanau. E iai le manatu o le a ta'oto atu i lau Susuga su'ega a le fanau, e fua i lau silasila ma lau fa'ataui i lona faiga ia faigofie mo i latou. Tautuana ia mautinoa ua amata ona mautu le tuufaatasiga o le tauloto I lenei masina e pei ona aoina vaega. A o se tu'ualalo, ia aofia uma mataupu ta'itasi o lenei masina na a'oa'oina i lau tapenaga. Manuia tele lau galuega lenei aso, manuia le a'oa'oina o le fanau.

\*\*\*\*\*

**ASO SA: TESEMA 6, 2026**

**MATAUPU 12: "O LE A FANAU MAI IESU" (Jesus will be born)**

**TUSI FAITAU: LUKA - 1: 26-31**

**SINI:** Ia malamalama le fanau i le fa'aaliga a le agelu ia Maria.

**FESOASOANI MO FAIAOGA:**

Malo le tauata'i, malo le onosai punoua'i i le soifua vala'auina mo le galuega a le Alii. Ua tatou taunu'u mai i le masina mulimuli a o le lasi mataupu foi o lenei tausaga, fa'afetai le lagolagosua i fa'atinoga a le Ekalesia aoao e ala i lana A'oga Aso Sa. Ua tatou iai i le vaitau o le Kerisimasi e fa'atalitali ma fa'amanatuina ai le fanau mai o lo tatou Alii Fa'aola. Peita'i, o le mataupu lenei aso, ua 'auina atu e le Atua lana agelu o Kaperielu e fa'ailoa lona fanau o Iesu ia Maria. Manuia lau tapenaga!

**FESOASOANI MO LE MATAUPU:**

Na 'auina atu e le Atua le agelu o Kaperielu i le a'ai o Nasareta i Kalilaia, i le taupou o le aiga o Tavita ua igoa ia Maria. Sa fa'ate'ia Maria i le o'o atu o le agelu ma fa'apea atu ia te ia, "Maria e, 'aue e te fefe, auā ua alofaina mai oe e le Atua. Fa'auta, o le a to oe, ma e fanauina se tama tane, e te fa'aigoa ia te ia o Iesu. Sa talia ma le loto maulalo e Maria le tala a le agelu. Lea na ia fa'apea ane ai i le fuaiupu 38: "Fa'auta, o a'u nei o le auauna a le Alii, ia faia ia te a'u e tusa o lau fetalaiga." E le'i fefe Maria i le tala ua o'o atu. Na talia ma le loto maulalo e Maria le finagalo a le Atua na fa'aali atu e le agelu. Ma ua fanauina ai e Maria le pepe o le Kerisimasi, ua igoa ia Iesu.

**A'OA'OGA:**

1. Aua le fefe, ua ia te i tatou le Atua. (Do not be afraid, God is with us)
2. Fa'afetai le Atua mo le pepe o Iesu. (Thank you Lord for baby Jesus)

**GALUEGA FA'ATINO: Tauloto / Ata Valivali**

Fai ni kopi o le ata ua tu'uina atu e valivali e le fanau, ma a'oa'oina le tauloto o loo i luga o le ata.

**PESE:** Go tell it on the mountain, over the hills and everywhere

Go tell it on the mountain, that Jesus Christ is born.

# DO NOT BE AFRAID MARY

**LUKE 1:30**



**ASO SA: TESEMA 13, 2026**

**SUEGA FA'AIU O LE TAUSAGA A'OGA 2026**

Ua tatou taunu'u mai i le Aso Sa mulimuli o mataupu o lenei tausaga a'oga. E le fa'aititia le agaga fa'afeta i a outou Susuga ona o fa'atinoga o lenei tausaga atoa. Fo'i le vi'iga i le Atua ona o le fa'aaogaina o lo tatou fa'atauva'a, e tausoa ai le galuega a le Alii e ala i le A'oga Aso Sa. Ua iai le manatu, o le a tu'u atu pea i lau Susuga vasega fa'ai'u o lenei tausaga mo sau fuafuataga e talafeagai mo nai fanau. Ae fa'amanuia tele le Atua i lou soifua ofoina e ala i le A'oga Aso Sa. Manuia le aga atu i le Kerisimasi, ma ia tatou aulia se tausaga fou manuia i le alofa o le Atua, Soifua!

**<<<<<<<<<MERRY CHRISTMAS AND A HAPPY NEW YEAR>>>>>>>>>**

**FAASOLOGA MATAUPU  
VASEGA AMATA 2 (TAUSAGA 5-7)  
AUKUSO - TESEMA 2026**

| <b><u>MATAUPU</u></b> | <b><u>ASO</u></b> | <b><u>AUTU</u></b>              |
|-----------------------|-------------------|---------------------------------|
| Mataupu 01            | Aukuso 02, 2026   | O Saulo, o le Tupu Sa'ili       |
| Mataupu 02            | Aukuso 09, 2026   | O Saulo o le Tupu Fa'amaoni     |
| Mataupu 03            | Aukuso 16, 2026   | O Saulo o le Tupu lē Usita'i    |
| Mataupu 04            | Aukuso 23, 2026   | E Sili le Loto nai lo'o le Tino |
| *****                 | Aukuso 30, 2026   | <b>MATAUPU FA'AMANATU</b>       |
| Mataupu 05            | Setema 06, 2026   | O le ā le Talalelei?            |
| Mataupu 06            | Setema 13, 2026   | Tala'i le Talalelei             |
| Mataupu 07            | Setema 20, 2026   | Autu o le Talalelei             |
| *****                 | Setema 27, 2026   | <b>MATAUPU FA'AMANATU</b>       |

| <b><u>OKETOPA</u></b> | <b><u>MALOLOGA MO LE LOTU TAMAITI</u></b> |                                 |
|-----------------------|-------------------------------------------|---------------------------------|
| Mataupu 08            | Novema 01, 2026                           | O lo'o ia te oe le Atua         |
| Mataupu 09            | Novema 08, 2026                           | Ua Lavea'iina Tanielu e le Atua |
| Mataupu 10            | Novema 15, 2026                           | Tavita ma Koliata               |
| Mataupu 11            | Novema 22, 2026                           | Lē Usita'i Iona i le Atua       |
| *****                 | Novema 29, 2026                           | <b>MATAUPU FA'AMANATU</b>       |
| Mataupu 12            | Tesema 06, 2026                           | O le a Fanau mai Iesu           |
| *****                 | Tesema 13, 2026                           | <b>SU'EGA FA'AI'U 2026</b>      |



